



REPUBLIKA E SHQIPËRISË
MINISTRIA E ARSIMIT
DHE SPORTIT
MINISTRI

Nr. 6894 Prot.

Tiranë, më 19/09 / 2014

UDHËZIM

Nr. 33, Datë 19/09 / 2014

PËR

“PROCEDURAT E PRANIMIT DHE REGJISTRIMIT, NË INSTITUCIONET E ARSIMIT TË LARTË PUBLIK E PRIVAT, NË VITIN AKADEMIK 2014-2015, TË STUDENTËVE QË TRANSFEROJNË STUDIMET NGA NGA INSTITUCIONET PRIVATE TË ARSIMIT TË LARTË TË CILËVE U ËSHTË HEQUR LIÇENCA”

Në mbështetje të nenin 102 të Kushtetutës së Republikës së Shqipërisë, ligjit nr. 9741, datë 21.05.2007 “Për Arsimin e Lartë në Republikën e Shqipërisë”, i ndryshuar, Vendimit nr. 539, datë 06.08.2014 të Këshillit të Ministrave “Për heqjen e licencës disa institucioneve private të arsimit të lartë”,

UDHËZOJ:

- I. Studentët të cilët kanë ndjekur studimet në Institucionet e Arsimit të Lartë (IAL) privat, të cilëve iu është hequr licenca, mund të aplikojnë për transferimin e studimeve në IAL publike apo private sipas procedurave dhe përcaktimeve të parashikuara në këtë Udhëzim.
- II. Studenti nuk mund të aplikojë për transferimin e studimeve në dy IAL njëkohësisht. Për aplikim studentit depoziton dokumentet si më poshtë:
 - i. Kërkesën për regjistrim;
 - ii. Lista e notave dhe kreditet e fituara për çdo lëndë, e cila do të shërbejë për ekuivalentimin e notave të lëndëve të programit të studimit të ndjekur;
 - iii. Për studentët që aplikojnë për transferim të studimeve në programe studimi të ciklit të parë, fotokopje të noterizuar të diplomës së Maturës Shtetërore së bashku me çertifikatën e notave, ose të një dëftese/diplome tjetër studimi të fituar jashtë vendit, të vlerësuar të barasvlershme me të në Shqipëri dhe të njohur nga Ministria e Arsimit dhe Sportit (MAS). Kandidati që ka përfunduar shkollën e mesme në

Republikën e Shqipërisë përpara vitit 2011, të dorëzojë fotokopje të noterizuar të dëftesës së pjekurisë të shkollës së mesme, së bashku me vërtetimin nga Agjencia Kombëtare e Provimeve (AKP) për shlyerjen e provimeve me zgjedhje nëse kanë dhënë provime të tilla. Në mungesë të diplomës së Maturës Shtetërore apo dëftesës së pjekurisë së shkollës së mesme duhet të paraqesë, respektivisht, vërtetim notash të Maturës Shtetërore dhe provimesh me zgjedhje, ose dublikatë të dëftesës së pjekurisë të lëshuar nga AKP ose nga drejtorja e shkollës së mesme dhe të vërtetuar në Drejtorinë Arsimore Rajonale/Zyra Arsimore përkatëse ose listën e notave të shkollës së mesme lëshuar nga Arkivi i Shtetit;

- iv. Për studentët që aplikojnë për transferim të studimeve në programe studimi të ciklit të dytë, përveç dokumentacionit të parashikuar në pikën II.iii të këtij udhëzimi, kandidati duhet të dorëzojë dhe fotokopje të noterizuar të diplomës/diplomave të ciklit/cikleve të mëparshëm të studimit të arsimit të lartë së bashku me çertifikatën e notave dhe suplementin e diplomës/diplomave përkatëse. Në rastet kur kandidati nuk disponon diplomën/diplomat mund të dorëzojë një dokument tjetër të vlefshëm për aplikimin për vazhdimin e studimeve në një IAL publike në vendin përkatës. Në rastet kur dokumenti është lëshuar nga një institucion i huaj ai duhet të jetë i përkthyer në gjuhën shqipe, si dhe i njohur në Republikën e Shqipërisë nga MAS;
- v. Kopje të noterizuar të dokumentit të identifikimit të vlefshëm;
- vi. Dokument bankar që vërteton pagesën e tarifës prej 3,000 lekë për aplikimin e kryer;
- vii. Deklaratën e plotësuar, sipas Shtojcës nr. 1 të këtij udhëzimi, e cila firmoset në praninë e punonjësit të sekretarisë mësimore dhe kundërfirmoset nga ky i fundit;
- viii. Numrin e matrikullimit;
- ix. Çertifikatë e mbrojtjes së gjuhës shqipe (për shtetasit e huaj);
- x. Dy fotografi personale.

IAL-ja mund të kërkojë dokumenta shtesë për të mundësuar vlerësimin e dosjes së kandidatit dhe regjistrimin e tij në IAL.

III. *Studentët të cilët përfitojnë nga kuotat e veçanta që do të aprovohen për vitin akademik 2014-2015 për studentët e transferuar nga IAL-të që iu është hequr licenca në IAL publike si dhe studentët që mund të kryejnë procedurat e transferimit në IAL private apo publike.*

1. Kanë të drejtë të aplikojnë për transferim në IAL publike dhe përfitojnë nga kuotat e veçanta që do të aprovohen për vitin akademik 2014-2015 për studentët e transferuar nga IAL-të që iu është hequr licenca, të gjithë studentët shqiptarë brenda territorit të vendit, studentët shqiptarë nga trojet jashtë kufijve të vendit dhe studentët e huaj, të cilët dispononin çertifikatë të mbrojtjes së gjuhës shqipe të lëshuar nga Fakulteti i Gjuhëve të Huaja, Universiteti i Tiranës, në momentin e regjistrimit në programin e studimit nga ku kërkojnë të transferohen.

2. Studentët e pa pajisur me numër matrikullimi nuk mund të transferojnë studimet e tyre në asnjë IAL publike apo private në Republikën e Shqipërisë. Lëndët e shlyera dhe periudhat e studimit të kryera prej tyre nuk mund të njihen nga IAL-të.
3. Studenti që transferohet nga një program studimi i cili, në momentin e regjistrimit të studentit ose në vitin ku është regjistruar studentit në atë program studimi, rezulton të mos ketë qenë i licencuar nga MAS, edhe pse Institucioni që e ofronte atë ka qenë i licencuar konform kuadrit ligjor në fuqi, mund të aplikojë për t'u transferuar në vitin e parë të studimeve në një program të njëjtë ose të ngjashëm studimi, sipas listës së shpallur për ekuivalentimin e programeve nga secila IAL publike, por nuk i njihen lëndët e shlyera dhe kreditet e përfituara më parë.
4. Për studentët që kanë ndjekur një program studimi për të cilin është kërkuar akreditimi, por nuk është akredituar, për arsye të mosplotësimit të kushteve dhe standardeve sipas akteve ligjore e nënligjore në fuqi, zbatohen përcaktimet në pikën III.2 të këtij Udhëzimi.
5. Studenti që ka ndjekur një program studimi të paakredituar për arsye se:
 - a. IAL-ja nuk ka aplikuar për akreditimin e programit të studimit dhe ishte brenda afateve të përcaktuara në aktet ligjore e nënligjore në fuqi për të kërkuar akreditimin e programit të studimit, para hyrjes në fuqi të Vendimit nr. 539, datë 06.08.2014 të Këshillit të Ministrave "Për heqjen e licencës disa institucioneve private të arsimit të lartë";
 - b. Programi i studimit nuk është vlerësuar ende, por në të njëjtën kohë, nuk janë kapërcyer afatet e parashikuara për akreditimin në momentin e hyrjes në fuqi të Vendimit nr. 539, datë 06.08.2014 të Këshillit të Ministrave "Për heqjen e licencës disa institucioneve private të arsimit të lartë",

mund të aplikojë për t'u pranuar në një program të njëjtë ose të ngjashëm studimi, sipas listës së shpallur për ekuivalentimin e programeve nga secila IAL publike. IAL-të tregojnë vëmendje të veçantë në trajtimin e këtyre rasteve. APAAL i dërgon të gjitha IAL-ve listën e programeve të studimit të IAL-ve që i është hequr licenca, sipas kategorizimeve të mësipërme, brenda datës 25 Shtator 2014

6. Studenti që ka përfunduar studimet dhe nuk është diplomuar dhe/ose nuk ka marrë diplomën pranë IAL-së që i është hequr licenca, do të konsiderohet si student që nuk ka përfunduar studimet dhe mund të aplikojnë për transferimin e studimeve konform këtij Udhëzimi.
7. Studentët, për të cilët IAL-ja nuk ka dorëzuar dosjen në MAS e as ia ka dorëzuar atë studentit, të cilët janë pajisur me numër matrikullimi, mund të aplikojë për t'u pranuar në vitin e parë të studimeve në një program të njëjtë ose të ngjashëm studimi, sipas

listës së shpallur për ekuivalentimin e programeve nga secila IAL publike, por nuk i njihen lëndët dhe kreditet e shlyera më parë.

IV. Aplikimet për transferim të studimeve pranë IAL-ve publike.

1. MAS i dërgon IAL-ve publike që do të pranojnë studentët, syllabuset e planet e mësimorë të përgatitur nga Agjencia Publike e Akreditimit të Arsimit të Lartë (APAAL) për çdo program studimi.
2. Të gjithë studentët që kanë ndjekur një program të dytë studimi, pra që kanë filluar studimet e tyre në IAL-të që i është hequr licenca, pas përfundimit të një programi tjetër studimi të të njëjtës tipologji Bachelor, Master Profesional apo Master i Shkencave, mund të aplikojnë në IAL-të publike dhe private në vend sipas përcaktimeve të këtij Udhëzimi.
3. Çdo student që ka ndjekur një program tjetër studimi paralelisht me programin e studimit të ndjekur pranë IAL-së që i është hequr licenca, mund të zgjedhë:
 - a. Të qëndrojë i regjistruar në programin e studimit ku vazhdon të jetë i regjistruar. Me këtë zgjedhje studenti heq dorë përfundimisht nga transferimi nga programi i studimit të IAL-së që i është hequr licenca. Kandidati kryen çregjistrimin pranë IAL-së përkatëse dhe dorëzon fotokopjen e vërtetimit të çregjistrimit në IAL-në ku aplikon për transferim. Fletën e çregjistrimit origjinale e nis në rrugë postare në AKP, e cila kryen procedurat përkatëse.
 - b. Të heqë dorë nga programi tjetër i studimeve, duke aplikuar për transferim nga programi i studimit të IAL-së që i është hequr licenca sipas përcaktimeve në këtë Udhëzim. Kandidati kryen çregjistrimin pranë IAL-së përkatëse dhe dorëzon fotokopjen e vërtetimit të çregjistrimit në IAL-në ku aplikon për transferim. Fletën e çregjistrimit origjinale e nis në rrugë postare në AKP, e cila kryen procedurat përkatëse.
4. Studentët me shtetësi të huaj mund të aplikojnë sipas afateve dhe procedurave të ndjekura në këtë udhëzim duke dorëzuar, përveç dokumentacionit të parashikuar në pikën 2 të këtij Udhëzimi, dhe dokumentacionin e mëposhtëm:
 - a. Vërtetim që nuk ka qenë i ndjekur penalisht dhe që nuk është në ndjekje penale, në vendin e origjinës, i lëshuar 3 muajt e fundit;
 - b. Çertifikatën e njohjes së gjuhës shqipe, lëshuar nga Fakulteti i Historisë dhe Filologjisë së Universitetit të Tiranës, dhe të gjuhëve të tjera të njohura nga kandidati, të lëshuar në periudhën e regjistrimit të tij në programin e studimit nga ku kërkon të transferohet. Shtetasit e huaj që kanë kombësi shqiptare dhe kanë njohuri shumë të mira të gjuhës shqipe mund të sjellin çdo dokument që

provon njohjen e gjuhës shqipe në nivelin e kërkuar (për shembull, diplomë e kryerjes së një cikli studimi në gjuhën shqipe, etj.);

- c. Kopjen e njësuar të origjinalit të lejeqëndrimit për shtetasit e huaj, lëshuar nga Ministria e Brendshme.

5. IAL-të ngrejné komisionet e vlerësimit dhe ekuivalentimit të programeve të studimit për të dy ciklet e studimit, të cilat do të kryejné ekuivalentimin paraprak të programeve të studimit.
Ekuivalentimi do të realizohet ndërmjet programit të studimit, të ofruar më parë nga IAL-të private të cilëve iu është hequr licenca, sipas dokumentacionit të depozituar në APAAL për licencimin e programit të studimit të miratuar me urdhrin e hapjes së programit përkatës dhe riorganizimeve të mëpasme të miratuara, dhe programeve të studimit të ofruara nga IAL-ja publike pritëse.
6. IAL-të publike, brenda orës 12.00 të datës 29 Shtator 2014, përpilojnë dhe shpallin listat e programeve të studimit të ekuivalentuara dhe i vendosin në vende të dukshme në mjediset e rektoratit dhe fakulteteve.
7. Nga data 29 Shtator deri në orën 12.00 të datës 3 Tetor 2014, nga ana e studentëve, kryhet aplikimi, me dokumente origjinalë (sipas pikës II të këtij udhëzimi), për programet e studimit të ofruara nga Fakulteti përkatës, sipas listave të programeve të studimit të ekuivalentuara. Brenda datës 3 Tetor 2014, IAL-të publike dërgojné në MAS listat e aplikantëve duke specifikuar kandidatët të cilët pas shqyrtimit të dosjeve, rezultojné me dosje të regullta, të shoqëruar me planin e veprimeve për ekuivalentimin e studimeve të kryera, si dhe i shpallin ato publikisht në vende të dukshme, faqet web të IAL-së dhe media elektronike dhe të shkruar.
8. Komisionet e vlerësimit dhe ekuivalentimit të ngritur pranë IAL-ve publike kryejné vlerësimin dhe ekuivalentimin e dosjeve të kandidatëve që rezultojné të rregullta me qëllim ekuivalentimin e rezultateve individuale të secilit prej studentëve gjatë ndjekjes së programeve përkatës të studimit në IAL-të private të cilëve iu është hequr licenca, deri në orën 12.00 të datës 8 Tetor 2014. Ekuivalentimi individual bëhet duke u bazuar në ekuivalentimin paraprak për program studimi.
9. Këto komisione kryejné për çdo student aplikant, vlerësimin dhe njohjen e lëndëve e detyrimeve të shlyera, krediteve të grumbulluara si dhe të periudhave të studimit, bazuar në ekuivalentimin paraprak të programit përkatës të studimit. Ky komision ngrihet me vendim Senati Akademik mbi bazën e propozimeve të ardhura nga njësitë kryesore përkatëse.
10. Dekanatet e fakulteteve, bazuar në vendimin e komisionit të vlerësimit dhe ekuivalentimit shpallin, brenda datës 8 Tetor 2014, të dhënat për çdo kandidat, kreditet e ekuivalentuara, detyrimet dhe lëndët e pashlyera si dhe vitin në të cilin transferohet.

11. Në periudhën nga data 8 Tetor deri në datën 16 Tetor 2014 bëhet regjistrimi i studentëve pranë sekretarive mësimore të fakultetit përkatës dhe paguhet tarifa përkatëse. Shuma e derdhur nuk kthehet edhe në rastet kur kandidati largohet nga programi i studimit.
12. Studentët të cilët nuk dëshirojnë të regjistrohen në mënyrë përfundimtare pranë IAL-së publike ku kanë aplikuar, kanë të drejtë të kërkojnë kopje të dokumentacionit që kanë dorëzuar, të shqyrtuar nga komisionet përkatëse, dhe të aplikojnë, eventualisht, në një IAL tjetër private. Pas tërheqjes së dokumentacionit, studenti nuk ka më të drejtë të aplikojë pranë një institucioni të arsimit të lartë publik për të përfituar nga kuotat e veçanta që janë aprovuar për studentët që transferohen nga IAL-të që u është hequr licenca, në zbatim të Vendimit nr. 539, datë 06.08.2014 të Këshillit të Ministrave "Për heqjen e licencës disa institucioneve private të arsimit të lartë", si për vitin akademik 2014-2015 dhe për vitet akademike në vijim.
13. IAL-të publike i dërgojnë MAS-it dhe AKP-së listën e studentëve të regjistruar, brenda datës 3 Nëntor 2014, me qëllim pajisjen e tyre me numër matrikullimi. Për të gjitha emrat e studentëve të dërguar pas kësaj date nuk do të procedohet me dhënien e numrave të matrikullimit dhe do të kërkohej nga AKP-ja çregjistrimi i tyre.
14. Kandidatët të cilët nuk aplikojnë për t'u regjistruar brenda afateve të parashikuara, nuk regjistrohen brenda afateve, apo ndërpresin studimet e tyre pas regjistrimit, humbin të drejtën për të kërkuar transferim të studimeve apo regjistrim në IAL-të publike në të ardhmen.

V. *Aplikimet në IAL-të publike në programe studimi që parashikojnë konkurs për pranimin e tyre.*

1. Studentët që kanë ndjekur programe studimi të cilat, në momentin e regjistrimit të këtyre studentëve në IAL-të private që u është hequr licenca, parashikojnë konkurs për pranimin në IAL-të publike përkatëse, i nënshtrohen konkursit të pranimit në këto institucione. MAS monitoron konkurset e pranimit dhe procedurat e ndjekura për vlerësimin e studentëve.
2. Studentët ndjekin të gjitha procedurat e aplikimit të parashikuara në pikat 1 – 5 të pikës IV të këtij Udhëzimi.
3. Nga data 29 Shtator deri në orën 12.00 të datës 2 Tetor 2014, nga ana e studentëve, kryhet aplikimi, me dokumente origjinalë (sipas pikës II të këtij udhëzimi), për programet e studimit të ofruara nga Fakulteti përkatës, sipas listave të programeve të studimit të ekuivalentuara.
4. Konkurset e pranimit zhvillohen pranë IAL-ve përkatëse në datat 3 - 4 Tetor 2014, bazuar në aplikimet e paraqitura nga studentët sipas afateve të parashikuara në këtë

udhëzim. Studentët paguajnë në momentin e aplikimit tarifën e parashikuar për regjistrim në konkursin e pranimit nga IAL-ja respektive.

5. Vlerësimi i studentëve bëhet sipas kriterëve që kanë qenë të parashikuara në udhëzimin e vitit akademik në të cilin studentin është pranuar në IAL-në private që i është hequr licenca. IAL-ja pranon të regjistrojë studentin, nëse numri i pikëve të fituara në përfundim të përllogaritjes së pikëve totale, bazuar në pikët e konkursit dhe të rezultateve të Maturës Shtetërore, nuk është më i vogël se numri i pikëve të përfituara nga kandidati më i fundit fitues në vitin akademik përkatës në programin e studimit ku aplikon studentin për t'u transferuar. Për studentin që i është nënshtruar në vitin akademik përkatës konkursit të pranimit pranë IAL-së publike ku kërkon të transferohet, merren për bazë pikët totale të grumbulluara nga studentin në përfundim të atij konkurrimit.
6. Konkursët e pranimit në këto IAL të monitorohen nga përfaqësues të MAS.
7. Nga data 6 Tetor 2014 deri në orën 12.00 të datës 8 Tetor 2014 komisionet e vlerësimit dhe ekuivalentimit të ngritur pranë IAL-ve publike, sipas përcaktimeve në pikën 9 të pikës IV të këtij Udhëzimi, kryejnë vlerësimin dhe ekuivalentimin e dosjeve të kandidatëve që rezultojnë të rregullta dhe që kanë kryer konkursin e pranimit sipas përcaktimeve në këtë Udhëzim, me qëllim ekuivalentimin e rezultateve individuale të secilit prej studentëve gjatë ndjekjes së programeve përkatës të studimit në IAL-të private të cilëve iu është hequr licenca, si dhe përllogarisin pikët totale për çdo student. Ekuivalentimi individual bëhet duke u bazuar në ekuivalentimin paraprak për programin e studimit.
8. Dekanatet e fakulteteve, shpallin, brenda datës 8 Tetor 2014, të dhënat për çdo kandidat që ka aplikuar, duke specifikuar kandidatët që pranohen të regjistrohen në vijim të shqyrtimit nga komisioni sipas specifikimeve të parashikuara në këtë Udhëzim, kreditet e ekuivalentuara, pikët totale të grumbulluara, detyrimet dhe lëndët e pashlyera si dhe vitin akademik ku transferohen.
9. Për këta studentë aplikohen parashikimet e pikëve 12 – 14 të pikës IV të këtij Udhëzimi.

VI. *Aplikimet për transferimin e studimeve pranë IAL-ve private.*

1. Kandidatët aplikojnë pranë IAL-ve private nga data 25 Shtator deri në 13 Tetor 2014.
2. Komisionet e vlerësimit dhe ekuivalentimit të ngritur pranë IAL-ve private, kryejnë vlerësimin dhe ekuivalentimin e rezultateve të arritura nga studentët që kanë ndjekur studimet në IAL-të private të cilëve iu është hequr licenca në pajtim me procedurat dhe kërkesat në përputhje me aktet ligjore dhe nënligjore në fuqi. Këto komisione ngrihen në nivel njësie kryesore (fakulteti) dhe kryejnë për çdo student aplikant vlerësimin,

njohjen dhe ekuivalentimin e lëndëve e detyrimeve të shlyera, krediteve të grumbulluara si dhe të periudhave të studimit. Ky komision ngrihet me vendim Senati Akademik mbi bazën e propozimeve të ardhura nga njësitë kryesore përkatëse. Në rastin e institucioneve private të arsimit të lartë, senati përcakton dhe numrin maksimal të studentëve që do të pranohen në zbatim të këtij vendimi në çdo program studimi, në mënyrë që të respektohen standardet e cilësisë të parashikuara në aktet ligjore e nënligjore në fuqi.

3. IAL-të private shpallin listat, të dhënat për çdo kandidat, kreditet e ekuivalentuara, detyrimet e lëndët e pashlyera si dhe vitin akademik ku duhet të regjistrohen.
 4. Në IAL-të private aplikantët regjistrohen përfundimisht brenda datës 17 Tetor 2014.
 5. IAL-të private i dërgojnë MAS-it dhe AKP-së brenda datës 3 Nëntor 2014, në rrugë postare, listën e studentëve të regjistruar, në formë shkresore dhe elektromnike në format excel, me qëllim pajisjen me numër matrikulimi. Për të gjitha emrat e studentëve të dërguara pas kësaj date nuk do të procedohet me dhënien e numrave të matrikullimit dhe do të kërkohet nga AKP-ja çregjistrimi i tyre.
- VII. IAL-të publike e private kryejnë regjistrimin e studentëve në regjistrat bazë brenda afateve të parashikuara në këtë Udhëzim, si dhe konform Udhëzimit nr. 31, datë 16.09.2014 "Për pajisjen e institucioneve të arsimit të lartë publik dhe privat me regjistrat bazë të studentëve", duke përdorur regjistra më vete, vetëm për këta studentë, si dhe duke përdorur një regjister për çdo program studimi dhe për çdo vit studimi ku ata do të regjistrohen, sipas ekuivalentimit të kryer.
- VIII. AKP pajis studentët, për të cilët IAL-të publike dhe private kanë përcjellë listat me të dhënat përkatëse brenda afateve të parashikuara në këtë udhëzim, me numrin e matrikullimit, dhe ia komunikon atë me shkresë zyrtare IAL-së përkatëse brenda datës 3 Dhjetor 2014. Në rastet kur një student nuk mund t'i jepet numri i matrikullimit, AKP i kërkon IAL-së ta çregjistrojë atë. IAL çregjistron studentin brenda 10 ditësh kalendarike nga marrja e kërkesës zyrtare nga AKP.
- IX. IAL-ja mund të pranojë studentë të transferuar në një program studimi:
- a. vetëm në ato vite që frekuentohen dhe nga studentë të regjistruar në vitet e kaluara akademike pranë kësaj IAL-je;
 - b. nëse brezi i studentëve që frekuentojnë këtë program studimi në vitin akademik 2014–2015, ka filluar studimet në vitin e parë, pas datës së liçencimit të programit të studimit në fjalë.

IAL-ja nuk mund të aktivizojë një vit të caktuar të programit të studimit vetëm për studentët e transferuar.

15. Në momentin e regjistrimit në IAL-të publike e private, nga ana e studentit nënshkruhet deklarata sipas Shtojcës nr. 1, e cila ruhet në dosjen personale të studentit.
16. Ky udhëzim është i vlefshëm vetëm për regjistrimet dhe transferimet e studimeve të studentëve që vijnë nga IAL të cilave u është hequr liçenca dhe aplikohet vetëm për pranimet për vitin akademik 2014 - 2015.
17. Ngarkohen për zbatimin e këtij udhëzimi, Sekretari i Përgjithshëm, Drejtorja e Arsimit të Lartë dhe Shkencës, në Ministrinë e Arsimit dhe Sportit, Agjencia Publike e Akreditimit të Arsimit të Lartë, Agjencia Kombëtare e Provimeve, si dhe institucionet publike dhe private të arsimit të lartë.

Ky udhëzim hyn në fuqi menjëherë dhe botohet në "Fletoren Zyrtare".

LINDITA NIKOLLA



MINISTËR



Shtojca nr. 1

Deklaratë

Unë i nënshkruari _____, lindur më _____

emri atësia mbiemri

me kartë identiteti/pasaportë nr. _____

1. Autorizoj institucionin e arsimit të lartë _____ Ministrinë e Arsimit dhe Sportit dhe Agjencinë Kombëtare të Provimeve për trajtimin e të dhënave të mia personale në kuadër të aplikimit dhe regjistrimit për vazhdimin e studimeve universitare në Institucionin e sipërcituar, si dhe publikimin eventual të tyre.
Autorizoj, gjithashtu Ministrinë e Arsimit dhe Sportit dhe Agjencinë Kombëtare të Provimeve për kryerjen e të gjitha verifikimeve dhe marrjen e të gjitha informacioneve lidhur me: studimet universitare ku kam aplikuar për t'u regjistruar, periudhën e studimeve të kryera më parë, dhe çdo lloj verifikimi tjetër që lidhet me sa më sipër.
2. Deklaroj se nuk kam aplikuar për t'u regjistruar në asnjë institucion tjetër të arsimit të lartë, për vitin akademik 2014-2015.
3. Deklaroj se nuk po ndjek ndonjë program tjetër studimi në institucione të tjera të arsimit të lartë, dhe se nuk do të ndjek njëkohësisht një program tjetër studimi, deri në përfundimin e programit të studimit ku po aplikoj.
4. Deklaroj vërtetësinë e të dhënave dhe dokumenteve të paraqitur. Jam i vetëdijshëm se, në rast deklarimit të të dhënave të pavërteta apo të paraqitjes së dokumentave të fallsifikuara apo me të dhëna jo të vërteta, jam subjekt i masave të parashikuara në Kodin Penal dhe aktet e tjera ligjore e nënligjore në fuqi. Në rast dyshimi për vërtetësinë e informacionit të deklaruar, Ministria e Arsimit dhe Sportit dhe/ose Agjencia Kombëtare e Provimeve dhe/ose IAL-ja nisin procedurën e kontrollit të tyre duke ia përcjellë këto të dhëna eventualisht edhe organeve kompetente.

Emër Atësi Mbiemër
i studentit që aplikon për transferim

Firma

Emër Mbiemër
i punonjësit të sekretarisë mësimore

Firma

Vendi: _____

Data: ____ . ____ . ____